

Dörflegeischer 1992

11 und 11 und 11 und 11
Das git bekanntlech meh als Zwöuf.
4 mou die Fasnachtszahl git 44 Jahr,
So alt si mer hüür, das isch de woher.
Die Schnapszahl fiire mir jetz do,
Und si als Fläsche-Geischer cho !

D' BSG chouft ds nöische Schiff,
Und meint, das Aare-Schiff heig Pfiff.
Doch leider churz scho nach em Start
Isch's z'Änd mit dere Jungferefahrt,
Dä Super-Kahn hett ir ganze Pracht
Zmitts uf em Wasser Siesta gmacht !

Was isch mit dere Frou passiert ?
Isch die mit em ne Bus kollidiert ?
Oder isch si gar überfalle worde,
Vo irgendere wilde Horde ?
Die Frou gseht drum so verhudlet dri,
Wüu sie im Carrefour-Usverchouf isch gsi !

Kei Braderie-Umzug hett me letscht Jahr gseh,
Als ächte Bieler tuet das eim weh.
Falls ds Komitee nid chunnt zur Vernunft,
Hei mir e Vorschlag a d'Faschingszunft:
Statt e Braderie-Umzug, s'isch nid zum lache,
E zwöite Fasnachtsumzug z'mache !

Es rot-wiss gschäggets Hochhuus ir Stadt,
Ei Bahnhof-Hälfti suuber und glatt,
Irgendwo es Freiliecht-Chino,
Wo wartisch, bis der Film tuet afo,
Ufem Nöimarktplatz frogt sech Gross und Chli,
Ob die komische Wäng es Pissoir söll si,
Am Zänti isch es Trottoir mit Plättli beleit,
Dass müglechst mäenge uf d'Schnurre gheit,
Do chunnsch nid druus, weder hinge no vorne,
Die Plastik-Usstellig isch doch zum horne !

Der Jean Chasselas seit zum Blocher Chrigu:
"Mais tue doch nid wie-n-e grosse ... ,
Isch säg' à toi ganz ehrlich et offe,
Pourquoi mir so viel Wi ei gsoffe,
Wenn d'Lager sont läär, bisch du das im Klare,
Mir chöi beaucoup Subventionne spare !"

D'Bieler Finanze si ufem Ranze,
Drum geit der Stöckli jetz uf ds Ganze:
Spare, spare, spare, spare,
Der Housi tuet scho Velöifahre.
Üs allne isch klar, das längt no net,
Choufet jedem Gmeinrat es Trotinet !

"Chumm - machs doch schnäll pär Telefon !"
Seit dir e Stimm mit rouchigem Ton.
Die Fernspräch-Sälbschtbefriedigung
Isch schiinbar in bi Alt und Jung,
Denn zum Telefentarif chöi Gäie und Schixe
Telefonisch mitenander ... !
Ohni Asteckig eine fahre lasse,
Und bir Poscht stimmt ersch no d'Kasse !

I dere Saison chasch bim EHC
Näbscht Russe ou Amis und Kanadier gseh,
Im Vorstand chasch näbem Laminet - doch dä seit jetz ade !
Der Ex-Prinz Ueli und e Motohändler gseh.
Was jetz no fäuht, dass es besser geit,
Isch eine wo öppis vom Ischhockey verschteit !